

Cultura cun u senza strategia chantunala

Il Café per ina prudenta consultaziun dal Teater da Cuira è frunta sin grond interess

DAD ANDREAS CADONAU

■ **La cultura carmala, il Café dal Teater da Cuira è stà ferm occupà il glindesdi passà a chaschun da la discussiun davart il sboz per la nova lescha da cultura. Ina discussiun ch'è plitost sa fatschentada cun dumondas formalas tranter regenza e cussegl grond enstagl cun il cuntegn dal sboz.**

Atgnamain, uschia il cusseglier guvernativ *Martin Jäger* il glindesdi en il Café dal Teater da Cuira, n'haja el insumma betg vuli sa participar a quella discussiun publica davart il sboz da la revisiun totala da la lescha chantunala da cultura. El e l'administraziun chantunala han terminà la lavur e preschentà il sboz. Ussa sajan las diversas instituziuns, partidas, organisaziuns e vischnancas envidadas da prender posiziun enfin mez avrigl. *Martin Jäger* ha vinavant punctuà ch'il sboz na saja betg sia proposta persunala ed era betg quella da l'Uffizi chantunal da cultura, mabain da la regenza grischuna. Il deputà e president da la Partida liberaldemocratica, *Bruno Claus*, è vegnì preschentà da la mainadiscussiun, *Ann-Marie Arioli*, la codirectura dal Teater da Cuira, sco iniziand da la revisiun totala da la lescha da cultura. El ha repetì sia critica vers la regenza grischuna da nun avair fatg la lavur. El ha renfatschà al cusseglier guvernativ, *Martin Jäger*, d'avair refusà l'incumbensa dal cussegl grond da betg sulet preschentar ina proposta per ina nova lescha, mabain da definir ina strategia da la politica da cultura e da stipular lingias directivas per applicar la lescha. Senza quella strategia e senza lingias directivas n'haja ina nova lescha da cultura nagina valur. La discussiun tranter *Martin Jäger* e *Bruno Claus* pertutgant las incaricas ed incumbensas da regenza e parlament nun èn novas e n'èn betg stadas en in context direct cun la lescha da cultura.



La runda da discussiun cun *Andri Perl*, *Bruno Claus*, *Ann-Marie Arioli*, *Martin Jäger* e *Marianne Fischbacher* (da san.) nun han tematisà il cuntegn dal sboz per ina nova lescha da cultura, dentant la mancanza dad ina strategia culturala chantunala.

FOTO A. CADONAU

Ina schlanca lescha cun novaziuns impurtantas

Il cusseglier *Martin Jäger* ha defendì il sboz per ina nova lescha da cultura ch'el ha titulà per schlanc, sa focussà sin l'essenzial e che cuntegnia diversas novaziuns impurtantas. Il cusseglier guvernativ ha er explitgà la tenuta da la regenza da desister da lingias directivas e da definir strategias. El è da l'avis ch'i fissia fauss da restrenscher la promoziun culturala sin il fundament da la situaziun actuala. *Martin Jäger* giavischa ina lescha che pussibilescha in svilup cultural. In svilup ch'el valitescha per impurtant gist en in chantun cun ina fitg gronda varietad culturala. Ulteriurmain ha

Martin Jäger visà al fatg che la procedura dad elavurar la revisiun totala da la lescha da cultura saja medema sco tar las revisiuns dad autras leschas. Schlettas notas n'ha il sboz da la nova lescha da cultura betg retschavi, era betg dals dus ulteriurs participants a la runda da discussiun. *Marianne Fischbacher*, conservatura dal Museum Regiunal Surselva ed anteriura presidenta da la Uniun dals museums grischuns, vesa dentant la necessitad per ina clera strategia culturala per il chantun. Ella è da l'avis ch'il chantun stoppia definir tgi e sut tge circumstanzas ch'il chantun porschia cunvegna da prestaziun ad instituziuns culturalas. Sulet quell'as cunvegna da presta-

ziun lubeschian a las instanzas ed organisaziuns dad events culturals ina tscherta segirtad da planisar a lunga vista. La proposta da la lescha stipuleschia bain la pussaivladad da stgaffir cunvegna da prestaziun. Las cundiziuns per quell'as cunvegna na sajan dentant betg enconuscentas. Aspects positivs vesa er il deputà ed autur *Andri Perl* en il sboz per la nova lescha da cultura. Ch'ina discussiun davart ina strategia culturala e lingias directivas en il cussegl grond possian meglierar quella lescha, dubitescha *Andri Perl* in zichel, cunzunt en vista a la situaziun finanziaria dal chantun che vegnia strusch a metter a disposiziun daplì daners per la cultura.